



Fornese asisténsia imigrasaun iha Austrália

Saida mak asisténsia imigrasaun nian?

Asisténsia imigrasaun nian mak bainhira ema ida uza koñesimentu, ka esperiénsia ho prosesu migrasaun hodi fo tulun ho aplikasaun vistu (visa) nian ka asuntu vistu sira seluk, hodi:

- trata, ka ajuda trata aplikasaun ba vistu ka dokumentu seluk
- fó konsellu kona-ba aplikasaun vistu ka asuntu vistu nian
- reprezenta ita iha iha tribunál ka autoridade revizaun nian, ka ajuda ita prepara ba prosesu sira-ne'e ka prosesu ne'ebé iha relasaun ho asuntu vistu nian.

Asisténsia imigrasaun nian la inklui kuandu ema seluk:

- fó tulun kleru ka administrativu nian bainhira ita rasik trata aplikasaun ka dokumentu seluk, porezemplu sira halo eskaneamentu (fotokopi) ka haruka dokumentu ruma liuhusi internét
- fornese servisu tradusaun ka interpretasaun (durubasa) nian
- fó avizu katak ita tenke aplika ba vistu ruma
- fahe informasaun ne'ebé ema datoluk mak prepara tiha, sein fó sai detalhe kompletu ka espikasaun kle'an kona-ba informasaun ne'e.

Sé mak bele fó asisténsia imigrasaun iha Austrália?

Tuir lei, só agente migrasaun rejistadu, profisionál jurídku (legál) ka pesoa izenta mak bele fó asisténsia imigrasaun nian iha Austrália.

Ajente migrasaun rejistadu

Ajente migrasaun rejistadu tenke kumpre rekizitu koñesimentu no karakter balun atu bele tau naran iha lista hanaran Register of Migration Agents (Rejistu ba Ajente Migrasaun sira) ne'ebé disponivel iha Office of the Migration Agents Registration Authority (OMARA, Eskritóriu ba autoridade ajente migrasaun rejistu sira) nia sítiu internét www.mara.gov.au

Profisionál jurídku

Profisionál jurídku mak advogadu ida ne'ebé iha sertifikadu prátika jurídika nian iha Austrália. Profisionál jurídku sira bele fornese asisténsia imigrasaun nian liuhusi sira-nia prátika jurídku ka empresa legál.

Pesoa izenta

Tuir lei, ema ida bele fó asisténsia imigrasaun se nia la kobra osan ba sira nia asisténsia no sira mak hanesan:

- nomeadór (ema ne'ebe fó rekomendasaun), sponsor ka aplikante vistu nia membru família besik
- membru ida ba parlamentu, misaun diplomátika, postu konsulár ka organizasaun internasionál ruma
- ema ida ne'ebé fó tulun gratuitu atu prepara submisaun ida ba Ministru.

Informasaun seluk tan

Atu hetan informasaun seluk tan kona-ba sé mak bele fó asisténsia imigrasaun nian iha Austrália, inklui oinsá atu hatu'o preokupasaun sira kona-ba fornese asisténsia imigrasaun nian, favór loke Department of Home Affairs nia sítiu internét nia pájina hanaran '[Who can help you with your application?](#)' (Sé mak bele ajuda ita ho ita-nia aplikasaun?).

Ajente edukasaun

Ajente edukasaun la'ós pesoa izenta no labele fornese asisténsia imigrasaun tuir lei Australianu, exetu sira mós ajente migrasaun rejistadu ka profisionál jurídku.

Pena sira ba fó asisténsia imigrasaun ne'ebé la tuir lei

Ema ne'ebé fó asisténsia imigrasaun iha Austrália, exetu ema ne'e ajente migrasaun rejistadu, profisionál jurídku ka pesoa izensa, kontra lei.

Ema ne'ebé fó asisténsia imigrasaun ne'ebé la tuir lei bele hetan pena tama ba iha prizaun to'o tinan 10.

Kesar kona-ba asisténsia imigrasaun ne'ebé la tuir lei

Iha Austrália, ita tenke kesar ba Departamentu kona-ba ema ruma ne'ebé fó asisténsia imigrasaun ne'ebé la tuir lei. Hodi halo nune'e ita tenke uza [Border Watch Online Report](#) (Relatóriu Online Vijilánsia Fronteira nian) iha Departamentu nia sítiu internét.